

Guru SAR diberi tempoh sebulan ke sekolah kerajaan

UM 23 JAN 2003

KUALA LUMPUR 22 Jan. — Kementerian Pendidikan memberi tempoh sebulan bermula 27 Januari hingga 28 Februari ini kepada semua guru Sekolah Agama Rakyat (SAR) seluruh negara untuk berkhidmat di sekolah-sekolah di bawah Kementerian Pendidikan.

Ketua Pengarah Pendidikan, Datuk Abdul Rafie Mahat memberitahu, guru-guru SAR yang berkelayakan akan diserapkan sama ada sebagai Guru Sandaran Tidak Terlatih, Guru Sandaran Terlatih atau untuk lantikan tetap.

Beliau memberitahu pelawaan terhadap guru-guru SAR tersebut adalah disebabkan oleh sikap prihatin Kementerian Pendidikan terhadap masa depan dan kebajikan tenaga pengajar di SAR yang tidak mendapat latihan dan layanan yang sewajarnya.

Katanya, sistem pendidikan yang efisien memerlukan profesionalisme tenaga pengajarnya dengan sokongan pelbagai kemudahan di sekolah.

“Untuk itu, guru-guru SAR wajar menerima pelawaan Kementerian Pendidikan ini dengan bijak tanpa ada prasangka dan sentimen politik,” katanya kepada pemberita selepas mesyuarat pasca Kabinet di Kementerian Pendidikan hari ini.

Perdana Menteri, Datuk Seri Dr. Mahathir Mohamad dalam kunjungannya ke Kelantan minggu lalu turut mengimbau guru-guru SAR supaya diberi peluang untuk menyertai skim guru Kementerian Pendidikan.

Abdul Rafie menasihatkan guru-guru SAR yang berminat untuk berkhidmat dengan Kementerian Pendidikan supaya berhubung terus dengan Pejabat Pendidikan Daerah Bahagian atau Pejabat Pendidikan Negeri.

Bagaimanapun, tegasnya sentia permohonan daripada guru-guru SAR akan diteliti berdasarkan kelulusan serta kelayakan mereka serta terpaksa melalui proses temuduga yang ditetapkan oleh kementerian.

“Calon-calon yang diterima masuk ke dalam Perkhidmatan Pendidikan Malaysia akan menerima latihan bersesuaian sebagaimana yang diberikan guru-guru di negara kita hari ini,” jelasnya.

Beliau turut memberitahu, guru SAR yang diterima berkhidmat akan menikmati pelbagai kemudahan seperti guru dalam Kementerian Pendidikan iaitu elaun, kemudahan pinjaman perumahan, kereta dan komputer.

Kini terdapat lebih 4,000 guru SAR yang mengajar di 43 sekolah rendah dan 225 sekolah menengah agama yang mempunyai sekitar 74,000 pelajar di seluruh negara.